

Berita Harian

⋮

# ‘Kena ada bukti kuat kerajaan PN hilang majoriti’

14 Oct 2020 [+26 more](#)

Kuala Lumpur: Pelucutan dan lantikan Perdana Menteri (PM) perlu melalui peringkat tertentu berlandaskan Perlembagaan Persekutuan dan memerlukan satu proses verifikasi oleh Yang di-pertuan Agong.

Pakar Perlembagaan, Prof Dr Nik Ahmad Kamal Nik Mahmood, berkata antara

perkara akan dipertimbangkan adalah sama ada wujud bukti kuat bahawa kerajaan Perikatan Nasional (PN) sudah hilang majoriti dalam Dewan Rakyat.

“Kita perlu melihat secara keseluruhan kerana proses ini bukan mudah, walaupun Datuk Seri Anwar Ibrahim menghadap Yang di-pertuan

Agong sambil menyatakan jumlah menyokongnya, ia tidak semestinya diterima baginda.

“Baginda yang akan memutuskan sama ada orang yang mendakwa mendapat sokongan majoriti dilantik sebagai PM atau orang lain yang mungkin juga menjadi pilihan,” katanya ketika

dihubungi BH, di sini, semalam.

Nik Ahmad Kamal berkata, proses ini tidak dinyatakan secara jelas dalam Perlembagaan, tetapi sudah menjadi sebahagian adat resam Perlembagaan yang diterima pakai di negara Komanwel.

Mengulas nasihat Al-sultan Abdullah supaya Anwar akur dan menghormati proses perundangan seperti termaktub dalam Perlembagaan Persekutuan, beliau berkata, Tan Sri Muhyiddin Yassin selaku Perdana Menteri juga berhak menerangkan kedudukan beliau.

“Perdana Menteri masih ada hak, pertama untuk memohon supaya baginda membubarkan Parlimen, hak ini ada dalam Perlembagaan.

“Maka, mesti wujud keadaan pada hemat baginda, Perdana Menteri hilang majoriti, yang kedua sama ada baginda memanggil menghadap atau Perdana Menteri berjumpa Yang di-pertuan Agong untuk memohon membubarkan Parlimen atau sama ada memilih untuk meletakkan jawatan,” katanya.

Beliau juga tidak menolak ada kemungkinan titah Seri Paduka itu berbentuk ‘teguran’ supaya ahli politik

tidak menimbulkan spekulasi awal sebelum menghadap baginda.

“Jika benar Anwar sudah mendapat sokongan majoriti, jangan diuar-uarkan, sebaliknya lebih baik menghadap Yang di-pertuan Agong, mungkin ini yang cuba baginda sampaikan,” katanya.

Sementara itu, pengasas Jurisprudens Watan yang juga Profesor Madya, Fakulti Pengurusan Industri, Universiti Malaysia Pahang (UMP), Datuk Dr Wan Ahmad Fauzi Wan Husain, berkata titah baginda supaya Anwar akur dan menghormati proses perundangan, bermakna

## Related Stories

[Tiada senarai nama](#)  
Harian Metro 14 Oct 2020

[Agong ada prerogatif tunda sembah perkenan menghadap](#)  
Berita Harian 12 Oct 2020

[Bekas Yang Dipertua Dewan Rakyat cadang PN rombak Kabinet](#)  
Berita Harian 16 Oct 2020

baginda merujuk Perkara 43(4) Perlembagaan Persekutuan.

“Apabila baginda bertitah perlu mengikut proses perundangan, ini bermakna

baginda merujuk Perkara 43(4) bahawa ‘apabila seorang Perdana Menteri tidak lagi mendapat kepercayaan majoriti ahli Dewan Rakyat, maka Perdana Menteri hendaklah

meletakkan jawatan Jemaah Menteri, melainkan jika atas permintaannya Parlimen dibubarkan oleh Yang di-pertuan Agong.’

“Apabila Tuanku menasihati sedemikian, maknanya baginda bertindak sesuai dengan kedudukan sebagai Yang di-pertuan Agong, iaitu pemelihara Perlembagaan Persekutuan dengan berdiri teguh atas pemerintahan yang adil,” katanya ketika dihubungi, di sini, semalam.

Wan Ahmad Fauzi berkata, jelas dalam titah itu, baginda meletakkan isu keselamatan dan kesihatan rakyat yang dilanda gelombang ketiga

COVID-19 sebagai keutamaan berbanding pergelutan politik.